



Visoki predstavnik se sastao s generalnim sekretarom Ujedinjenih naroda Ban Ki-moonom

Visoki predstavnik Valentin Inzko sastao se jučer sa generalnim sekretarom UN-a Ban Ki-moonom, nakon podnošenja izvještaja Vijeću sigurnosti UN-a u utorak.

Visoki predstavnik je istaknuo osnovne aspekte njegovog najnovijeg izvještaja Vijeću sigurnosti UN-a, u kojem je izrazio posebnu zabrinutost oko intenzivirane antidržavne retorike i pokušaja podrivanja i slabljenja državnih institucija koji dolaze od strane visokih zvaničnika Republike Srpske.

Izrazivši žaljenje što su neki stranački lideri, posebno u Federaciji BiH, potrošili nekoliko mjeseci na reorganizaciju vlasti, visoki predstavnik je pozdravio činjenicu da stranački lideri u posljednje vrijeme pokazuju znakove da su voljni vratiti se dijalogu. On je izrazio nadu da će lideri u ovoj zemlji sada početi upravljati državom, da će se suzdržati od izjava koje destabiliziraju političko okruženje i načiniti pomake koji će im omogućiti da za šest mjeseci izvještaj bude mnogo pozitivniji.

Visoki predstavnik je zahvalio generalnom sekretaru na njegovoj nedavnoj posjeti Bosni i Hercegovini i na neprekidnoj podršci i opredjeljenju za očuvanje trajnog mira i stabilnosti u Bosni i Hercegovini.